

Guillaume
Du Bellay

DOVBLE DV.

NE LETTRE ESCRIPTE

PAR VNG SERVITEVR DV

Roy treschrestien a ung Secretaire Alemant son

amy: Auquel il respond a sa demande sur les que-

relles & differens entre Lempereur & ledict sei-

gneur Roy. Par laquelle il appert euidem-

mēt lequel des deux a este aggresseur

autant en la premiere, quen la

presente guerre.



AV BOVT DICELLE EST AD

iouste une arbre de consanguinite dentre les maisons de France,

Austriche, Bourgogne, Milan, & Sauoye: Par laquelle il appert eui-

demment qui uient aujourdhuy a la succession desdictes maisons.

F

39

326

1536 d

THE NEWBERRY
LIBRARY



H E R & grant amy, Encores que les lettres que tu mas escriptes sur le faict de la guerre, qui maintenāt sallume entre Lempereur & le Roy mon maistre, & sur le blasme quon en donne audict seigneur Roy, me ayent cause diuerses affections en lesprit: Si est ce quen ceste diuersite, combien que tu me sembles estre ung peu trop mal affecte au pty du Roy mon maistre, ie nay toutesfoys trouue chose pour laq̃lle ie te doibue estimer aultre que tu as tousiours este: cest à dire, hōme droict & sincere: car pour te ueoir enclin à fauoriser ton Empereur (par aduēture plus que nen uouldroit la raison) cela ne ma point fort esmeu: cognoissant que ung chascun tant par nature, que par coustume, fauorise uoluntiers (& iusques a faire siennes) les causes du prince soubz leq̃l dieu tout puissant luy a donne le moyen & occasion de uiure. Mais de te ueoir en ceste persuation, que Lempereur soit entierement hors de coulpe de ceste guerre, & que le Roy y soit en coulpe de tout ce que on luy meēt a sus: cela certes ma autant esmeu & trouble, cōme depuis ma rappaise, ce que par icelle lettre tu me pries te faire sur ung chascun article particulierement entendre, cōment les choses a la uerite se sont portees depuis le cōmencemēt iusques a ceste heure: ce qui me faict croire, que si tu as receu en ton esprit aucune mauuaise opiniō du Roy, quelle ne soit encores si profondement enracinee, quon ne la puisse oster & defraciner, en te faisant apparoir de la uerite qui est au cōtraire. Car si tu eusses eu ce iugemēt arreste, puis que Lempereur la dict, que par cōsequent le Roy fust indubitablement coupable, pour neant demandois tu comment se sont portees les choses, & pour neant me trauailleroys ie en ton endroict a en descharger sedict seigneur. A ceste cause desirant que tous ses faicts & entreprinse soyent approuuees par toy & tes semblables, iamais ie ne feray chose plus uoluntiers ne de meilleur

A 2 couraige

courage que de obeir en ceste requeste, & te respondre a chascun des articles par lesquelz on tasche, ainsi que tu mescripz, de le amener en haynne & malueillance du monde. Vray est que de ce faire, & de deffendre son honneur contre les faulses accusations de ses aduersaires, ie nay aucune charge ne commission de luy: parquoy ie ne puis pas estre si bien instruiet, comme ieusse este par ses tiltres & enseignemens. Toutesfois puis que ien ay assez de congnoissance pour satisfaire avecques uerite a ce que tu mescrips luy estre mis a sus, & que a luy comme a mon prince naturel, ie doibs cest office & debuoir. Je ne ueulx en cest endroiect faillir a ton desir, esperant traicter la chose en sorte, que ie te feray congnoistre & ueoir a loeil entierement, que toutes les choses quon luy impute ou sont controuuees, ou non subiectes a reprehension.

Premierement quant a, la diuersite des doubles de la protestation faicte par Lempereur contre le Roy deuant le Pape en son consistoire, lesquelz on ua semant & diuulgant ca & la, si differens quil nen ya deux accordans ensemble. Sur ce que tu me demâdes lequel me semble estre le uray double dicelle protestation: ie te aduertis que ie nestoye lors a Romme, parquoy ie nen scaurois respōdre au uray: & iusq̃s icy nen ay ueu aucun double dont ie uoullisse asseurer quil ny ait addition, ou diminution selon que chascun malicieusement, & suiuant ses affections, y a uoulu diminuer, amplifier, & changer, comme tu scais que la malice & malheurete des temps est telle aujourdhuy, quil se trouue prou de gens ennemys du repos publicq, & qui ont faict naufrage de leur reputation: pour ce quen une Republicque bien cōposée & tranquille, il ny a place qui soit pour eulx en ladministration dicelle, uouldroient bien quil y eust tousiours quelque chose mal a point, & quelque tempeste suscitee, en esperance dy estre employez, & par ce moyen rentrer en credit: ou que durant la tempeste & trouble de la chose publicque, ilz trouueront quelque port & ressource a leur propre
& par

& particulier dommage. Ce q̃ a mon aduis se trouuera estre
duenu es choses qui sont en termes maintenant. Car
il m'est uenu es mains beaucoup de choses publiees au
nom de Lēpereur, lesquelles ie cuyde auoir estre supposees
par aultruy qui aura cherche a aigrir les choses: & par rai-
son du mōde ne me scauroye persuader que ung Empereur
es eust uoulu mectre en auant, si mal fondees quelles sont,
contre homme quel qu'il soit, non que contre ung tel Roy,
qui est son beaufreire. Pour toutesfoys satisfaire a ta demā-
de, sinon en tout, au moins en partie & entant que possible
ne sera. Saches que iay bien ueu une lettres escriptes au
Roy par deux Ambassadeurs siens, estans lung deuers le
Pape, & lautre deuers Lempereur, faisans mention de ceste
protestation, lesquelles lettres (si bien men souuient, & si le
double que tu men as enuoye, imprime en allemant, ma este
fidelement interprete) ne me semblent gueres esloigner du
dit double, apres lequel est imprimee la respōse que le Roy
a faicte, & laquelle response (si ie nen ay bien perdu la me-
moire) ie ose iuger estre fidelement & au uray traduicte.
Mais pour ten mectre entierement hors de doubte, incont-
inent que ie seray de retour en Frāce, ien recouureray ung
double collationne a loriginal par ung des secretaires du
Roy, que ie te feray seurement tenir.

Or pour entrer en la principale matiere, Tu mescrip-
z qu'on mect en auant contre le dict Seigneur iusques aux
fautes de ses predecesseurs: & mesmement du Roy Loys
douziesme son beaupere, Auquel on mect a sus, que ayant
obtenue de Lempereur Maximilian une inuestiture condi-
tionale du Duché de Milan, a condition, que ledict Roy
bailleroit a femme sa fille aisnee a Larcheduc Charles, qui
est Lēpereur aujourdhuy regnāt, il auoit faulse sa promes-
se audict Empereur, baillāt sa fille a ung aultre, dont Lem-
pereur irrite & meu de iuste indignation, auroit dechasse
ledict seigneur Roy hors dicelluy duché de Milan.

Certainement grant amy ie uoy qu'il ya de gens grande-

ment plains de inique & tresmauluais uouloir encontre le Roy, quant ilz cherchent a le rendre odieux & mal uolu par le forfait daultuy, & par tel forfait qui est manifestement faulx & controuue: car il ya milliers infinis de personnes encores uiuans, ausquelz il souuiēt tresbien, que non seulement au temps que ledict Roy Loys fut dechasse de Milan, mais plus dung an, & pres de deux, apres, sa fille ainee estoit encores a marier. Aussi leur souuient bien, que Lempereur Maximilian en ce temps la pourchassoit pour ledict Charles, aujourdhuy Empereur, Marie fille du Roy Henry septiesme Dangleterre. Item linuestiture est encores en estre, laquelle en peult faire foy, & aduerer la mensonge sus le champ: car il ny est fait aucune mention de la condition par eulx alleguee. Ains par icelle est ledict Roy Loys inuesty purement & simplement pour luy & ses enfans males & femelles: & sa posterite deffaillant en est inuesty cōme plus proche heritier dicelluy Duche Francoys alors duc de Vallois, & Conte Danguoiesme a present Roy. Parquoy semble que ceulx qui ueullēt en cest endroit chercher ledict feu Roy dauoir faulse sa foy audict feu Empereur, le font a escient pour donner occasion de ramenteuoir en y repliquant que ledict feu Empereur peu sainctement (car pis ne ueulx ie dire) garda sa foy audict Roy Loys: au moyen & a layde duquel il auoit recouuert plusieurs grosses seigneuries & fortes places en Italie & ailleurs, & du quel il auoit receu pour la susdicte inuestiture grosse somme de deniers, montans pour le moins a plus de cent cinquante mil escuz: Lesquelz deniers il employa par aduenture a dresser la mesmes armee, par laquelle il spolia ledict seigneur Roy dicelluy duche, dont peu auant avecques congnoissance de cause, & meure deliberation de ses princes il lauoit inuesty.

Et puis que nous sommes sur le propos de ceste inuestiture, nest elle pas suffisante pour confuter lautre obiection, quon fait (ainli que tu mescriptz) a lencōtre du Roy, disant que sans tiltre, & sans aultre occasion, que destēdre ses limites plus

plus loing, il aspire au duche de Milan, & que par force
a tort il en dechassa Maximilian Sforce, & que avecques
mesmes tort, & au grāt trouble du bien & repos de la Chre
iente il le redemāde maintenant. Mais ie ueuil reprendre
ceste matiere de plus hault, & te mōstrer que icelluy Duche
uy appropriēt, non seulement a cause de ladicte inuestiture,
mais par droit hereditaire de ses ayeul & bisayeul. Car il
sult que tu entēdes (si tu ne le scays) que Iehan Galeaz duc
de Milan, pere de Philippes Marie, aussi duc, & le dernier
de la maison des Viscontes, entre aultres enfans eut une fil
e nommee Valentine, ceste Valentine fut donnee a femme
du duc Loys Dorleans, filz du Roy Charles cinquiesme de
ce nom, & frere du Roy Charles sixiesme, avec cōdition ap
posée au traicte de mariage qui aultrement ne se fust ac
comply, que la, & au cas q̄ la ligne masculine diceulx ducz
de Milan uiendroit a defaillir, les descendās dudit mariage
succederoient & tiendroient lieu de ligne masculine. Ce
traicte de mariage avecques ses conditions approuuerent
& ratifierent le Pape qui seoit lors, auquel estoit le droict
deuolu par la uacation de Lēpire, & aultres qui pourroient
pretendre interest. De cedit mariage sortirent Charles,
Philippes, Iehan: Charles fut Duc Dorleans, & pere du feu
Roy Loys, dont nous parlons, qui par la mort du Roy
Charles huitiesme uint a la couronne: Philippes fut Con
te de Vertus, & mourut sans hoirs de sa chair: Iehan fut
Comte Dangoulesme duquel fut filz Charles aussi Con
te Dangoulesme, pere du Roy Francoys aujourdhuy re
gnant. Ainsi tu uoys que ledict seigneur uient a ce Duche
de son chef, & par droict hereditaire, comme a fief ancien de
ses ayeul & bisayeul. Car en Philippes Marie, qui mourut
sans enfās masles, & sans legitimes, fallit la ligne des Viscontes
des Ducz de Milan, & nōobstāt que Frācisque Sforce occu
pa le Duche apres la mort dudit Philippes Marie, duq̄l il
eut espouse la fille bastarde, si est ce que luy & ses enfans ia
mais nen peurēt obtenir inuestiture, iusques a ce que le feu
Emper

Empereur Maximilian a la persuation de ie ne scay qui, e
inuestit Ludouic Sforce, sans aucune cōgnoissance de cau
se; laquelle inuestiture de soy non uallable, il reuoca depuis
& declaira estre nulle apres cōgnoissance de cause. Et (com
me iay dict cy deuant) par meure deliberation de ses prin
ces adiugea ledict Duche au Roy Loys dessus nōme, leque
il en inuestit : auquel Loys apres sa mort le Roy Francoys
a succede, non seulement au Royaulme, mais au Duche
dont il estoit prochain heritier, inuesti en la personne du
premier Duc Loys Dorleans son ayeul, & depuis recon
gneu tel, & de rechef inuesti a ce tître par ledict feu Empe
reur Maximilian : laquelle inuestiture combien quelle fac
foy, que son droict a este congneu, ne luy estoit toutesfoi
necessaire pour luy acquerir droict, qui ia luy estoit acquis
comme scauent assez ceulx qui entendent les usaiges &
coustumes de fiefz.

Lempereur doncques en le spoliant sans cōgnoissance d
cause, a contreueni ausdictz usaiges des fiefz Imperiaulx
qui le deffendent, & aux priuileges du saint Empire, qui
a iure de garder.

On replicque au contraire, si le Roy y a eu droict qui
ne la plus, par la cession quil en a faicte, pour se tirer, & me
seigneurs ses enfans hors de captiuite. En cest endroict ie n
ueulx entrer en dispute, Par quel droict, ne par quelle hu
manite, oultre une grosse somme de deniers que Lēpereur
a eue pour la rancō du Roy, plus grosse, que les infideles n
lont extorquee par cy deuant des Roys de France, qui ont
este leurs prisonniers, oultre ce quil luy a baille sa soeur
femme sans dot, oultre plusieurs aultres iniustes & defrai
sonnables cōditiōs, non acoustumees par cy deuāt en rācor
de Princes, ledict Empereur a peu extorquer du Roy, qui a
des enfans, ceste cession, dung fief ancien, procedant de ses
ayeul & bisayeul, & qui debuoit appartenir a sesdicts en
fans, non seulement du chief de luy, qui est leur pere, mais
de leur ayeul maternel, & tritayeul paternel de cela (dis ie)
ne ueulx

ne ueuil ie entrer en dispute, mais bien dune chose en laq̃lle
ie suis seur de gaigner ma cause, specialement deuant iuges
de uostre nation, en laq̃lle on tend à garder inuiolablement
lequite des droictz & priuileges feudaulx, cest que le Roy
na peu en maniere quelconq̃s alïener icelle Duché au preiudice
de sesdictz enfans: dont est q̃ ie ne me puis assez esmer-
veiller, comment ceulx, qui alleguent ceste cession contre le
Roy sont ouys en ce pays de Germanie, auquel (plus quen
nul aultre) les droictz feudaulx sont obseruez avecq̃s telle
diligence, religion, & cerimonie, quon tient à reprochables
& indignes destre hantez, ceulx qui ne hazardent toutes
choses pour conseruer les fiefz es familles & races ou ilz
sont. Nonobstant toutes choses quon puisse auoir fai-
ctes au contraire, & au preiudice dicelles familles, soit par
cession, ou uendition, ou par aultre maniere quelconques.
La raison est, car ce sont droictz & priuileges attribuez
aulx races, & non aulx personnes, & sont tellemēt adherens
& affectez ausdictes races, que si messeigneurs ses enfans y
uouloient renoncer, ilz ne pourroient du uiuant du pere, &
seroit la renonciation inualide, quant au preiudice deux
mesmes qui renonceroiēt, & si apres la mort de luy, ilz y re-
noncoient, la renonciation seroit pareillemēt inualide, & ne
pourroit preiudicier quant a ceulx qui apres leur mort se-
roient appelez a la succession diceluy Duché.

Tu mescriptz apres, quon donne blasme au Roy de ce,
que estant la chrestiente en grant repos & tranquillite, il la
mise en trouble & tempeste, en prouocant Lempereur, au-
tant en ceste, quen la precedente guerre: & mesmement quil
a tousiours prouoque en la saison que ledict Empereur a
este sur le poinct de faire entreprinse pour le bien & augmē-
tation de la chrestiente. Je te dis au contraire, que Lempereur
a este prouocateur tant en la precedente guerre, quen
ceste cy, que nous uoyons se allumer au grāt trouble pour
le present, & a plus grand dangier pour laduenir, de la Re-
publicque chrestienne: ce q̃ ie ne doubte point q̃ ie ne puisse
B uerifier

uerifier a tous & ennemys & amys, sil ny auoit gens qui uoulussent nier la uerite mesmes estre uerite.

Et pour entrer en propos de la guerre precedente: L'empereur se plainct, & maintient, q̃ le Roy suscita messire Robert de la Marche a luy faire la guerre. Or entendz grant amy cōment il en est au uray: Entre ledict messire Robert, & le seigneur de Emeries eut premierement dissension & proces, Et depuis guerre ouuerte, pour ung chasteau nomme Hierge: uray est que messire Robert qui a son pays uoy sin de France, & duquel les Enfans ont de gros biens & de grosses seigneuries au Royaulme, y leua des gens de guerre: L'empereur uoyant que ledict messire Robert pensionnaire du Roy, auoit entrepris ceste guerre contre le seigneur de Emeries sien pensionnaire, & a l'aduēture persuas de par ledict de Emeries, lequel se sentant foyble le uolul attirer a son ayde, que ceste guerre nestoit entreprinse par ledict messire Robert sans le sceu, & par aduenture instigation du Roy, qui soubz couleur dicelle poulseroit plus outre, entreprint tellement la protection dudict seigneur de Emeries, que ledict messire Robert sen adressa contre ledict Empereur mesmes, Surquoy ledict Empereur dressa grosse armee. Et nonobstant que le Roy, sans le sceu duquel & luy estant griefuement malade, iceluy messire Robert auoit leue des gens en France, incontinent quil en fut aduertit, auoit faict uenir deuers luy Lembassadeur dudict Empereur, & sen estoit non seulement excuse a la uerite, ains auoit offert secours audict Empereur cōtre ledict messire Robert sil en estoit requis: & sur le champ enuoya ung gētilhomme de sa chābre en diligence & sur cheuaulx de poste, pour faire retirer tous les gens de guerre de ses pays, sur peine de la uie: & auquel mandement il fut tellement obey q̃ messire Robert, lequel alors donnoit l'assault a une place, nommee Vireton, & ia estoit sur le point de la emporter, se trouua soudainement destitue de ses forces, & fut cōtrainct dabādonner l'assault, & se retirer en ses places, dont peu apres il en perdit la plus

plus part, & de bien bonnes & fortes, qui estoit assez pour donner a cōgnoistre a Lempereur, que ledict seigneur Roy n'estoit aucteur de ceste entreprinse: toutesfoys ledict Empereur ou pour enuie, quil eust au parauant de se attacher au Roy, ou se uoyant une telle armee preste, & ne uoulant y auoir faict les frais si grands, sans lemployer en quelque affaire dimportance: Comment que ce soit, ne se contenta dauoir couru le pays dudict messire Robert, & de lauoir reduict en sa place de Sedon: mais fist passer son armee au delans des pays du Roy, & print Moson, auant que le Roy ceut nouuelles, quil auoit la guerre sur les bracs: puis assiegea Mezieres dheure que le Roy a grāt peine eut loysir de mectre gens dedās, lesquels la deffendirent uertueusemēt, & donnerēt temps audict seigneur, de mectre ensemble une puissante armee, pour la uenir secourir: icelle armee dressée & confesse quil uint en personne, leua le siege, passa la riuier de Lescault, entra sur le pays de Lēpereur, y print quelqs fortes places, & le reduisit en necessite de se retirer au loing pour mectre sa psonne hors de dāgier. Mais ie ne uoy point tout cela se puisse interpreter en sorte q̄ le Roy y ait este prouocateur: lequel print les armes non de sa pure uolūte, mais contrainct a ce faire, pour deffendre le sien, & uenger oultrage a luy faict.

Et a ceste cause ceulx qui ueulent sur ceste querelle dire quil soit prouocateur, uoyans que le fondement ny est suffisant pour approuuer leur dire, recourent a une aultre q̄relle, laq̄lle en soy est aussi mal fondee, q̄ la premiere: mais est plus apparēte & plus facile a psuader a plusieurs, q̄ nont eu la hantise & congnoissance du pays, & de laffaire dont est question: car il fault entēdre que iusques icy, ilz nont iamais fuis leur fondement sur les faictz, ne sur les causes, mais seulement en persuasion: & quant ilz ont bien artificieusement couloure les faulx faictz quilz ueulent poser, alors ilz les mectent en auant, & en remplissent les oreilles, & les espritz du peuple: puis quant ilz le uoyent persuade contre

celuy quilz ont uoulu charger, alors ilz donnent ordre a clorre toutes les entrees & passaiges, assiegent les uoyes publicques, menassent & font guetter les Ambassadeurs de laccuse, de peur quil uienne a sa congnoissance comment, de quoy, & par qui, il est calūnie, ou sil y uient, quil ne sen puisse uenir, ou enuoyer se iustifier & regetter la malueillāce sur ceulx quil appartient.

Or mectent ilz en auant, que le Roy au parauant q̄ Lempereur leust iamais assailly auoit donne secours a lencontre de luy, au Roy Henry de Nauarre, que Lempereur appelle seigneur Dalbret, desdaignant luy donner tiltre de Roy. Mais affin que tu entendes myeux ceste article, ie te ueui reciter sommairement toute lhystoyre.

Lempereur Maximilian apres auoir long temps & pour neant poursuiui enuers le Pape Iulle deuxiesme de ce nom quil eust a cōuoquer ung Concile general, chose tres necessaire au bien & reformation de la chrestieté, se delibera de le conuoquer, & de faict le conuoca, uoulust ou non le Pape. A Lempereur Maximilian adhererent les Roys, Loys de France, & Iehan de Nauarre, & plusieurs Princes, Cardinaulx, Euesques, & aultres: le Pape de cela irrite, les anathematisa tous, les declara schismatiques, & heretiques, & a tort ou droit, priua les Roys & Princes de leurs Royaulmes, & principaultez, les Ecclesiastiques de leur dignitez & benefices, donna les Royaulmes & principaultez a qui premier les occuperoit, cōfera les benefices a aultres psonnes. Ferdinād Roy des Espaignes ayeul maternal de ton Empereur, prenant ceste occasion pour bonne & suffisante, ce pendant q̄ le Roy de Nauarre son uoy sin, parent, & allye estoit absent de son Royaulme en la court du feu Roy Loys, que dieu absoulle, & lequel nayant inimytie avecques personne, ne se doubtoit aucunement de guerre: soudainement & a limprouiste inuada le Royaulme de Nauarre, le occupa, & fournit de garnisons, & apres sa mort la laisse audict Empereur. Voyla le droict (si extreme tort

port se peult appeller droict) que Lempereur a au Royaulme de Nauarre. Et sil ueult maintenir le dict Royaulme auoir este iustement occupe, & maintenant estre par luy iustement retenu, il fault necessairemēt que auant toutes choses il aduoue que Lempereur Maximilian son ayeul paternel, fust hereticque & schismaticque, par meilleure & plus forte raison, que ledict Roy de Nauarre, qui ne fut que aduersaire & accesser audict Empereur Maximilian, aucteur principal & conuocateur dudit Concille.

Or ledict Roy de Nauarre, lequel tenant le party du feu Roy Loys, auoit ainsi este spolie de son Royaulme, se retira deuers luy, & fist ung traicte, par lequel iceluy Roy Loys estoit tenu de luy ayder a la reconqueste de son Royaulme: quelque temps apres mourut le Roy Loys, & peu apres le Roy Iehan de Nauarre, & leur succederent chascun en son temps, le Roy qui aujourd'hui regne a la couronne de France, & Henry au Royaulme de Nauarre, lesquelz reconfermerent entre eulx lalliance de leurs predecesseurs. Enui ce temps mourut aussi le Roy Ferdinand, & uolut Charles Archeduc Dautriche, a present Empereur, filz de la fille dudit Roy Ferdinand, entrer en Espagne comme Roy: les estatz des pays le uolurent bien accepter a Prince heritier du Royaulme, mais non a Roy, allegās quilz ne le pouoiēt faire du uiuant de sa Mere, laquelle uiuoit lors & encores vit, & qui debuoit heriter a la courōne premiere que ledict Charles son filz. Charles estant en ce trouble, se pourpensā que ayant lalliance & amytiē du Roy mon maistre, prince puissant, & tant par mer que par terre uoy sin des Espaignes, la faueur & auctorite de luy pourroit grādement luy ayder (ainsi quil aduint) enuers les estatz & princes Despaigne. Et a ces fins enuoya les principaulx de son conseil, deuers ledict seigneur, qui les recueillit gracieusement, & leur accorda son alliance & amytiē, aux cōditions & articles cōtenus au traicte: Mais usant de bonne foy, les aduertit auāt la main, du precedent traicte quil auoit avecques le Roy de

Nauarre, & comme il estoit tenu de luy ayder au recouurement de son Royaulme, Au moyen dequoy ledict Charles capitula, & promist, que dedans ung certain temps prefix contenu au traicte, il contenteroit ledict Roy de Nauarre & fut expressement dict & accorde (si comme le traicte le porte) que la & au cas quil ne cōtentaist iceluy Roy dedans le temps prefix, il seroit loysible au Roy mō maistre de luy donner le secours quil estoit tenu, sans que par ce moyen lamytie de luy & dudict Charles fut enfraincte, ne leur traicte rompu: lequel temps prefix pieca passe, & ledict Charles souuent interpelle, de contenter ledict Roy de Nauarre: ce quil ne fist, le Roy fut contrainct en uertu de son precedent traicte, donner audict Roy de Nauarre le secours quil estoit tenu, en quoy sil auoit a aulcun dōne cause de se plaindre, ce seroit plus tost audict Roy de Nauarre, pour auoir delaye le secours, que audict Empereur pour lauoir donne. Doncques ceulx qui par cy deuant auoient bien sceu, que le Roy auant que Lempereur lassaillist, auoit donne secours audict Roy de Nauarre: mais ne scauoient par aduenture que par le traicte dentre luy & ledict Empereur, il luy fut loysible de ce faire sans enfraindre la paix. A mon aduis quant ilz auront entendu ce que dessus, changeront d'opinion, & congnoistront que par cela, non plus que par lenstreprinse de messire Robert de la Marche, on ne scauroit dire ne prouuer, que le Roy fut aggresseur en la precedente guerre passee.

Le uiens a celle de present: Et pour en entendre le fons, fault scauoir que Philippe Conte de Beaugou, filz aîné du Duc Ayme de Sauoye, eut a femme Marguerite fille du Duc de Bourbon, & fut conuenue par mariage faisant, que les enfans qui en ystroient, representeroient leur pere, au droit de primogeniture, lordre dicelle primogeniture entre eulx garde: dudict mariage sortirent Philibert, qui eut a femme Marguerite fille de Lempereur Maximilian, lequel mourut sans enfans: Et Loys qui fut femme de Charles

Conte

Conte Dangoulesme, duquel elle a eu le Roy mon maistre, lequel par ce moyen uient a succeder entierement a tout le bien de sa grand mere Marguerite de Bourbon: Et comme representant Phiippines son ayeul maternel au droict de primogeniture, synon en tout, aumoins en tous les biens alioz liaulx, & qui peuuent tumber en quenoille, de la succession du Duc Ayme de Sauoye: Et uient a estre prefere au Duc Charles frere puisne du Duc Philibert, & yssu d'ung autre mariage, Dauantaige Nyce, Villefranche, & la principaulte de Piedmont, de tous temps immemorial ont este des appartenances du Côte de Prouence, & specialemēt ledict Piedmont annexe, uny, & incorpore inseparablément audict Côte de Prouence. Toutes lesquelles choses les unes apres les autres, & par succession de tēps, ont este occupees & usurpees, par les Ducz de Sauoye, en partie par force, en partie par emblee, & surprinse, & en partie par sollicitation des subgectz, a rebellion, ce pendant que les Contes de Prouence estoient occupez en aultres guerres: Ausquelz Contes de prouence le Roy a succede tant par heritaige, que par institution testamentaire.

Item ont lesdicts ducz de Sauoye usurpe plusieurs uilles & places du Marquisat de Saluces, au preiudice & diminution grande du Daulphine, dont est mouuant ledict Marquisat: Toutes lesquelles choses, ainsi que dict est, appartenans au Roy, il a faict souuent & gracieusement demander au Duc de Sauoye, en se subzmeçant a toutes raisons: Finalement toutes aultres uoyes esprouuees sans y prouffiter, il a este contrainct de uenir aux armes.

Mais si Lempereur ne uoloit dire que a luy touche de maintenir en possession iniuste tous ceulx qui usurpent du bien du Roy, ie ne uoys pas que ceste guerre luy puisse en riens appartenir, attendu que le Roy des le cōmencement dicelle, a trefexpressément commande, & a este songneusement obserue, quil ne fust touche a riens, de ce que ledict Empereur possedoit, a quelque tiltre que ce fust.

Et fil

Et sil ueult dire, que le Duc de Sauoye fust comprins a traicte de Cambray, il luy est satisfait par la responce que le Roy a faicte a sa protestacion : Car ledict Duc ny est comprins comme contrahent, & des droictz du Roy, ny est faicte aucune mention : Parquoy on ne peult pretendre, quil y soient comprins, ne que par le traicte le Roy y ait renonce ne promis de iamais les demander : Toutesfois L'empereur se couure de ceste raison, pour faire entendre quil a eue iuste cause dentreprandre la guerre contre le Roy, & soubs ceste coulleur a dresse son armee, ouuert la guerre, assaillies garnisons, substraict & suborne les uassaulx & subgectz dudit seigneur. Sy cela ne le peult conuaincre quil soit auctheur & aggresseur en ceste guerre, ie ne scay pas qui le conuaincra.

Or uouldroye ie bien entendre, quant gens d'experience & de bon iugement, poiseront a la raison loccasion pretendue par ledict Empereur, & quant ilz rapporteront au bureau le deportement passe dudit seigneur, comme il a secouru Cristienne Roy de Dānemarch, son beaufrere, le Roy Loyse de Hongrie son autre beaufrere, qui a la persuation de luy auoit entrepris la guerre contre le Turcq, en laquelle il fut par luy habandonne, & y mourut: cōment il a secouru ausssi contre le Turcq le Roy Ferdinand, son ppre & unique frere, cōmēt il a secouru son propre pays naturel, & le sainct Empire Romain, & aultres que ie ueuil obmeſtre pour cause de briefuete, desquelz il na pareillemēt entrepris la protection, encores quilz luy fussent de plus pres que le Duc de Sauoye : ie uouldroye (dis ie) bien entendre quilz pourroient imaginer, de ce que ledict Empereur aiant tenu si peu de compte de secourir ceulx que dessus cōtre le Turcq, ennemy hereditaire de nostre Foy, soit maintenant si ardent a secourir le Duc de Sauoye, contre le Roy treschrestien son beaufrere, qui ne demāde sinon ce qui est sien, & la souuēt, & par long temps faict demander par amytie : Et que ce pendant aux aultres qui ont occupe des pays dudit Duc, nō
seule

seulement nen face querelle, mais cherche & demande leur
amytie, leur offrât toutes choses qui pour ung grand bien-
faict se peuuent offrir. Ascauoir silz ne congnoistront pas
euidemment, que Lempereur a prins ceste occasion pour
excuse, & couleur dentreprendre ce que pieca il auoit con-
ueu en son esperit, & que uoluntairement il est entre en ceste
guerre, ou par affection & desir quil a de ruiner, si luy est
possible (comme il se uante quil fera) ledict seigneur Roy
son beaufreire, ou en intention que ceste guerre luy sera ung
commencement commode, & propice, pour poulser oultre
dautres choses ou il pretend, & quil brasse, lesquelles iay-
me mieulx, que chascun pense & comprenge a part soy,
que quil les entende de par moy.

On me replicquera, que Lempereur a bien entendu que
l'intention du Roy a este, par la conqueste de Sauoye facilliser
celle de Milan. Certes grant amy cela est deuiner a eulx,
& accuser aultruy sur ce quilz deuinent, non sur le faict de
luy, lequel nest point : Car en effect les gens du Roy, nont
en riens touche aulx limites du duche de Milan, parquoy il
est assez apparent que le Roy na donne aucune occasion a
Lempereur de luy mouuoir une si cruelle guerre: & que le-
dict Empereur na eu cause suffisante ne prouuable, de faire
siennne la cause de Sauoye, ueu que iamais na entrepris
auecques telle force ne pareille uehemençe, de uenger ou
deffendre ses beaulxfreres, son frere unique, son pays na-
turel, ne le saint Empire Romain; mais il est, ainsi que dict
le prouerbe commun, le nauire ua dung coste & les mari-
niers tendent ailleurs,

Icy replicquēt encores aulcuns des uostres, que si ores le
Roy auoit iuste tiltre au Duche de Milan, & aussi iuste cō-
tre le Duc de Sauoye, il ne debuoit toutesfois rien entre-
prendre en ce temps icy, pour nempescher le bien de la chres-
tiente, Car il ne pouoit ignorer que Lempereur entrepren-
droit, comment que ce fust, & lune & lautre querelle, par-
quoy il seroit destorne des saintes & honorables entre-
prises

prinſes ou il eſtoit entierement fonde : comme du Concile
uniuerſel, & de continuer ſa guerre encommencee pour
laugmentation de la Foy : dont aduiendroit que ces deux
princes eſtans en combuſtion, lung contre lautre, les he-
reſies & ſectes, dont le monde eſt maintenant ſi trouble,
prendroient touſiours accroiſſement : & le Turcq enne-
my de noſtre Foy prendroit couraige de nous courir ſus.
Diſent dauantaige, & oſent ſi meſchamment & malheu-
reuſement mentir, que le Roy ne ſeſt geſte aux champs,
ſinon a la perſuaſion & inſtigation du Turcq, auquel il a in-
telligence en toutes choſes : de cecy parleray peu apres.
Mais ſi Lempereur eſtoit ſi auant en ceſte ſaincte delibe-
ration, comment en peult il auoir eſte ſi legierement deſa-
tourne, que daſſaillir aultruy iniuſtement, habandonnant
ſans occaſion ſon entreprinſe, pour employer toutes ſes
forces a lencontre dung prince Chreſtien ſon parent & ſon
beaufrere ? Auquel ainſi que facilement on peult iuger
par ce que deſſus a eſte dict, il ne ſcauroit aultre choſe im-
puter, ſinon quil a par ambaffades & requestes, & iuſques
icy ſans aucune uoye de faict, prochaffe deſtre luy ou ſes
enfants reſtituez en leur ancien patrimoine, qui leur appar-
tient de droict ſi apparent, & ſi ſolemnellement conferme
par ledict Empereur Maximilian : Et le quel il nauoit cauſe
de penſer, qui luy debuoit eſtre reſuſe ou a ſes enfans, par
Lempereur, que uous faictes icy tant iuſte, tant equitable,
tant raiſonnable, & qui ſouuent luy auoit promis de le ren-
dre, aduenant la mort de Francisque Sforce, & qui aultres
fois lauoit bien donne audict Sforce qui ny auoit aucun
droict ne tiltre, & que luy meſmes a dict ſouuent luy auoir
eſte deſloyal & traistre.

Cela preſuppoſe, qui eſt choſe ueritable, poſons le cas,
que ledict ſeigneur ſur les nouuelles de la mort dicelluy
Sforce, & ſur eſperance que Lempereur luy tiendrait pro-
meſſe, ait uoulu recouurer ce que le Duc de Sauoye luy
occupoit, afin de continuer & conioindre ſes bournes &
limites

limites avecques ceulx diceluy Duche: Aura lieu pour-
tant entre uous aultres, qui estes si equitables, la persua-
sion des calumniateurs, qui soubz ceste ombre descrient
& luy & mesdictz seigneurs ses enfans, les publians
aucteurs du trouble de la Chrestiente, rompeurs de ses
uertueuses & sainctes entreprinſes, endureront ilz ce dis-
fame pour auoir iusques icy demande par uoye de raison
& par gracieuse requeste, restitution de leur ancien heri-
tage: & ceulx qui uiolentement detiennent l'autrui, soient
au contraire estimez purificateurs dicelle: & seulz au-
cteurs de sainctes entreprinſes: Je uouldroye bien entendre
quant le Roy auoit l'intention dessusdicte, en quoy auroit
il peche pourtant, ne contre Lempereur, ne contre ses traiz-
ctez: Certes en riens. Et pource ledict Empereur apres
longues dissimulations & plusieurs excuses toutes differen-
tes lune de lautre, desquelles il a use pour amuser le Roy, ce
pendant que luy se preparoit a la guerre, sest excuse finable-
ment, quil y auoit des potentatz ses alliez, lesquels ne uou-
loient point que le Roy ne ses enfans recourassent ce duc-
che, ausquelz ledict seigneur Empereur a mieulx ayme
complaire au preiudice de son honneur & conscience, que
dacquiter sadicte promesse enuers le Roy, & mesdictz sei-
gneurs ses enfans. Si doncques ceste sienne excuse est ueri-
table, pourquoy ne sest il arreste sur les limites dicelle, sans
passer plus oultre contre le Roy:

Faignons maintenant, que deuant Lempereur en une as-
semblee Imperiale fussent mesdictz seigneurs les enfans du
Roy, & quilz usassent uers luy de ce lāgaige. Seigneur Em-
pereur tu as nostre pere (lequel tu ne peulx nier auoir bien
merite de toy) uiolentement expulſe de son patrimoine, qui
apres luy nous appartenoit, & de tel patrimoine, que noz
predecesseurs apres lauoir cōquis a grans perilz & labeurs,
& grande effusion de leur sang, contre les Roys de Lom-
bardie, puissans & redoutables ennemis, lauoient liberalle-
ment attribue au sainct Empire, & duquel apres grāds laps
C 2 de temps

de temps & siecles, aultres noz predecesseurs ont este par
ledict saint Empire inuestis iustement & solemnellement.
Tu as iniustement cōtrainct nostredict pere de y renoncer.
& au preiudice de nous, qui sommes yssus du sang de ceulx
qui ont colloque ce saint Empire en Germanie, du bien &
forces duquel ta maison est peruenue en ceste grandeur
ou elle est: Tu le as donne aux descendans dung portefaix,
& dune bastarde. Apres leur mort, tu le retiens encores
uiolentement, quil ne retourne a nous, ausquelz il appar-
tient, Porce que nous ny consentons, & ne uoulons aduo-
uer que tu faces droicturierement, & ne uoulons estimer a
bienfaict ung si oultrageux tort: porce que nous supplions
nostre pere de nous y donner layde & faueur, que par droict
diuin & de nature il est tenu de nous donner: Pource quil
nous donne esperance de ce faire, tu accuses & luy & nous:
pour ce quil a entre par armes, mais sans grande effusion de
sang, en son bien maternal, & aultres, que iniustement on luy
retenoit, tu luy ueulx improperer quil la faict pour ouurir
les passages a recouurer le nostre. Et nonobstant q̄ sil lauoit
faict a ceste intention, il nen puisse estre iustement blasme, Tu
le charges de sa foy: tu luy metz a sus, & psuades aux gēs
qui ne scauēt la uerite de choses, quil trouble sans propos,
& a son esciēt la chrestiente: que aux personaiges insensez,
qui ont seme les miserables erreurs qui de nostre temps res-
gnēt, il a dōne cueur & hardiesse de les publier & soustenir:
quil a par ce mesmes moyen donne occasion au Turcq de
faire entreprinse sur les chrestiens, & qui pis est, quil a toute
intelligence avec les ennemys de nostre foy. Iusques ou,
beausire, ueulx tu estēdre ceste complaincte: Iusque a quoy
ueulx tu quelle ayt lieu: Ne metz tu poinct certains limi-
tes, lesquelz si nous ne transgressons, tu ne nous imputeras
point tous ces forfaitz: ou si tu ueulx establir, q̄ toutes cau-
ses te soiēt suffisantes, pour y fonder telle accusation que tu
uouldras: Si maitenāt que tu ueulx enuahir son Royaulme
luy & nous te uenons au deuant pour nous deffendre, Te
sera ce

fera ce encores donne occasion suffisante de nous accuser, & tascher de faire reprochables enuers tout le monde? Fault il doncques q̄ nous endurions ceste loy sur nous, de te laisser occuper du nostre, autāt q̄l te plaira, encores q̄ tu uoulistes de tout; aultrement q̄ nous soyons par toy estimez & diuulguez par tes libelles, nō seullemēt pour infracteurs de paix, uiolateurs de foy, perturbateurs du monde, mais amys & auteurs du Turcq, & des ennemis de nostre Foy?

Le te demande grant amy a une telle proposition de ces serenissimes ieunes princes, qui oncques n'offenserent personne, Comment peult Lempereur respondre chose qui soit receuable deuant ung equitable iuge, ne qui puisse rabatre le trenchant de ceste leur cōplaincte? Et sil ya de gens de bon sens, (cōme il y aura en une telle assemblee) ne cuydes tu point quilz reduiront a memoire, & considereront avecques iugemēt & meure deliberation, quelles augmentations ont faictz les Roys de Frāce, uniueruellement a la chrestietē, & particulierement a ceste noble Germanie, & a ce sainct Empire Romain, q̄ en la psonne de Charlemaigne y a este transferre, & par ses descendans & successeurs, augmentēte? Et que des pays & prouinces que ausdictz Roys ont appartenu, partie a cause de leur couronne, partie de leur chef & de leur patrimoine propre & particulier, le nom & l'estendue de uostre langue Germanicque sont augmentez, uostre Empire enrichy & annobly. Et lesquelles augmentations sont telles, quil seroit plus long de les nombrer, que de nombrer toutes celles qui sont aduenues audict Empire, par aultres quelzconques augmētateurs. Cuydes tu point quilz considereront & poiseront au cōtraire, que la maison Daustriche est augmētee & enrichie des biens de Lempire, & non pas Lempire des biens Daustriche. Cuydes tu point quilz considereront aussi que la maison de France ne tient rien qui fust oncques de celle Daustriche, & que au contraire celle Daustriche tient plusieurs terres & grosses seigneuries q̄ sont yssues de celle de Frāce, ou qui par elle sont
C 3 peruenues

peruenues es mains des predecesseurs & ancestres dudit
seigneur Empereur, lequel au moyen diceulx grans biens
& accessions de terres & seigneuries, est peruenu a ce com-
ble de grâdeur ou tu le uoys maintenant, le cuyde certaine-
mēt quil y aura prou de gens qui cōsidereront tout cecy, &
qui en considerant, auront horreur des calumnies & mēso-
ges qui ont este semees contre le Roy, & que cōtre ses tresil-
lustres ieunes Princes yssus de telle extraction, en ceste
fleur deage, en ceste innocence enuers tous, si bien ornez &
accomplis de toutes meurs & conditions appartenant a la
maison dont ilz sont, il soit use de telle iniquite (ie ne uuei
dire cruaulte) que par dessus une si uiolēte & iniuste occu-
pation & retētion de leur patrimoine, eulx pour ce quilz se
retirent au secours de leur pere, le pere pour ce que naturel-
lement & humainement il sencline a les fauoriser, soiēt diffamē-
mez de telle tache, cōme destre adherens aulx Turcs enne-
mys de nostre Foy? Et ce par ceulx mesmes, qui oultre les
droictz & liens daffinite & consanguinite (dont ilz les at-
touchēt) ont tant receu de bien & daugmētation de la cou-
ronne de France: Car dont a eu la maison Daustrie ce bel
& si bon & opulent Conte de Flandres, dont & par quelz
moyens luy sont uenus le Duché de Brabant, les Cōtez de
Bourgongne, Artoys, Ostreuāt, Haynnault, Namour, Hol-
lande, & aultres seigneuries quelle tient a present, partie en
la Gaule Belgicque, partie en la Germanie inferieure?

Il est bien aise (grant amy) non seulement daccuser, mais
de persuader a gens qui ne congnoissent lestat des affaires,
contre tel personnage que uouldra laccusateur, si cest assez
daccuser, & que laccuse ne soit ouy en ses deffenses, & que
laccusateur apres ql a gecté son uenyn, face (cōme ie disoye
nagueres) clorre les passages que laccuse ne puisse uenir
ou enuoyer se iustifier & purger, mais la uerite quoy que
ce soit, & dont q̄ ce soit, uient toutesfoiz a la fin en lumiere,
apres quelle a este quelque temps ensepuelie en tenebres, &
opprimée par calumny, & quant elle y uient, detant plus
quelle

quelle a este curieusement empeschee quelle ne comparust,
le tant plus elle apporte de gloire au calumnie, & au con-
traire de honte & reproche au calumniateur, ce que ie spered
& me confie que ie uerray aduenir en ceste matiere.

Or ueulx ie maintenant poser le cas, que le Roy aduou-
st a ses accusateurs, que son intencion eust este ueritable-
ment telle comme ilz la deuinent, quil ait uoulu par len-
reprise de Sauoye faciliter celle de Milan, sinon pour soy
quilz battent de sa renonciation, aumoins pour mesdictez
seigneurs ses enfans, qui ny ont point renõce, & ausquelz il
deult & doibt iustement & sainctement fauoriser, uoire quil
aduouast de leur uouloir bailler en main toutes ses forces,
& de ne leur faillir aux fraiz de la guerre, tant quilz aiēt res-
couuert ce qui doibt estre a eulx. Je te demande adoncques,
lequel depend lobstacle de la paix, lequel donne occasion
au Turcq de faire entre ces diuision entreprinse contre la
Chrestiente, ou celle qui apres auoir longtemps & pour-
ueant demande le sien par uoye de droit, & amyablement
cherche de le recouurer a lespee, ou celluy qui refuse de ac-
cepter ou uouloir paix, en baillant ce quil tient de lautruy.
Mais qui plus est, auant qui le spolie uienne iusques aux
armes pour auoir le sien, uient de nouueau lassailir en ses
pays, en intention de ne sen retirer quoy quil en aduienne a
la Chrestiente. Car ad ce que disent publiquemēt & se uan-
tent les gens de Lempereur, son intention est telle, de ne
desister de la guerre quil entreprend contre le Roy pour
chose qui en puisse aduenir, tant quil ayt totalement des-
truiēt & rendu le plus pauvre gentilhomme de la chrestiete,
car ce sont leurs motz, & tiennent la chose si faisable, quil ne
reste plus que a y mettre la main. Et a bien ose ledict Empe-
reur protester de sa bouche deuant le Pape & le consistoire
de Leglise Romaine, quil nya chose au monde qui luy
sceust faire tourner la teste en arriere de ceste guerre: Ains
que plustost il habandonneroit en proye au Turcq ses
propres pays quil laisse derriere luy: O parolle tresdigne
de estre

deſtre proferee par la bouche de celluy qui en aultre part d
ſon oraiſon proteſte, que pour auoir paix en Chreſtiente
non ſeulement il uouldroit laiſſer de ſon propre a aultruy
mais bailler ſoy meſmes a imoler & ſacrifier pour ung
grant bien. Le bien certainemēt eſt grant, mais il peult bien
y paruenir, ſans ſe faire ſacrifier, & ſans laiſſer du ſien a aul
truy, en rendant ſeulement a ceulx a qui il appartient ce
quil retient de l'aultruy, & par ce moyen tout ſera appaiſe.

Et ſil ueult maintenir que le duche de Milan n'appartiē
au Roy, & a meſdictz ſeigneurs ſes enfans, pourquoy ne
remect il la cauſe au iugement de ceulx quil appartient de
cōgnoiſtre: ie le oſe bien aſſeurer de la part dudict ſeigneur
Roy, & de meſdict ſeigneurs ſes enfans, que non ſeulement
ilz ne refuſeront de eſtre a droict, mais le deſirent & requie
rent. Et quil ſoit uray, ilz ont en ce preſent moys enuoye
ambaffadeur expreſ en ceſte voſtre Germanie, demāder aſſe
gnation de iournee, pour faire apparoiſtre de leurs droictz:
mais ledict Embaffadeur a eſte aduerti par gens de groſſe
auctorite, quil ſe tint bien ſur ſes gardes, & que non ſeulement
il ne pourroit auoir audience, mais ſil eſtoit rencōtre,
il ne trouueroit meilleur party que de la mort.

Votre liberte O meſſeigneurs les Allemans eſt elle re
duicte en ces termes: pouez uous ſouffrir: peult ce ſainct
Empire endurer, q̄ les Embaffadeurs dung tel Roy, lequel
& ſes predeceſſeurs ont ſi bien merite de la Chreſtiēte uni
uerſellement, & particulierement de voſtre Empire, ayent
iuſte cauſe de plaindre, que le droict commun des gens ne
leur ſoit garde en ceſte voſtre Germanie, & quilz ne ſoient
tenus ſi comme ilz doiuent ſacroſainctz & inuiolables: &
que ſi aucun dentre uous a deſir & affection quil ſoit gar
de, il ne ſen oſe deſcouvrir, & ſil a dict ung mot ou deux auſe
dictz Embaffadeurs, il luy faille incontinent ſe retirer en
crainte & haſte, de peur quil ſoit apperceu, ou que lon ſache
quil ait parle a eulx: Et affin que tu ne penſes (grant amy)
que ie ne te dye a la uerite, uoy ie te prie le double que ie
tenuoye

enuoye avecques la presente des lettres de creance dudict
seigneur Roy, & de mesdictz seigneurs ses enfans, & dunes
aultres dicelluy Embassadeur cōtenans en substance le sum
naire de sa commission, lesquelles lettres uoyant ledict
Embassadeur quil ne luy estoit possible de faire entendre sa
charge de bouche, a enuoye, & faict tenir a lūg des electeurs
pour icelles communiquer aulx aultres, & pour impetrer
dudict seigneur Roy & ses enfans assignation dune iour
nee, comme dict est, en laquelle ilz fissent apparoir de leurs
droictz, enseignemēs & tiltres; mais les choses sont aujour
dhuy entre uous aultres reduictes en tel estat, que ledict
Electeur na ose entreprendre den communiquer a ses com
paignōs, Tant sont aujourd'hui les cueurs haultains de vo
stre Germanie par la tyrānie dung homme absugectis: & a
respondu seulement ledict Electeur, quil enuoyroit le tout
au Roy Ferdinand frere de Lempereur pour se y gouuer
ner ainsi quil le scauoit bien faire.

Mais ie reuiens a Lempereur: Sil a si grant desir, comme
il dict, & ueult que nous croyons, de mettre la Chrestiente
en bonne paix & repos, pourquoy nen faict il foy? pour
quoy ne mōstre il par effect que cest la uraye fin ou il tend?
pourquoy ne souffre il, puis quil ueult se attribuer lhōneur
& gloire dung si grant bien, que le profit en redonde a aul
truy? A tout le moins pourquoy du prouffit qui en uiedra
nen faict il part a ceulx ausquelz il la ueult uendre si chere
ment? Ne deust pas ad ce le incliner, oultre le droict & lal
liance, la longue patience dont le Roy a iusques icy use.
Que dis ie patience? mais la gratification enuers luy? Car
ie ne scay de quel aultre nom plus conuenable baptiser la
cte, dont enuers ledict seigneur a este use par le Roy, lequel
ayant receu une extreme iniure par Francisque Sforce, qui
auoit faict mourir son Embassadeur estāt deuers luy: Ayant
ceste occasion de pouoir en uengeant cest oultrage recou
urer par ung mesmes moyen le patrimoine de ses enfans:
ayant ceste opportunitē que grant partie des principaulx

du Duché le y appelloient uoluntairement : Aultre opportunité de sa gendarmerie qui estoit assemblee pour les monstres generales, quil ne restoit que a la faire marcher. Aultre opportunité dune grosse troupe de lansquenets qui auoient execute l'entreprise, pour laquelle ilz auoient esté leuez en Germanie, & luy auoient enuoyé offrir leur seruice. Toutesfois a la requeste dudict Empereur qui dressoit son uoyage Dafricque & quil le pria de ne riens mouuoir tant quil fust de retour, il sen deporta uoluntairement & dissimula l'outrage, qui luy auoit esté faict, autant grant quon luy eust peu faire, & ce pour ne donner occasion au dict Empereur d'interrompre ou retarder son uoyage, lequel nous pensions tous ueritablement quil eust entrepris ainssi quil le publioit, pour le bien & augmentation de foy chrestienne: mais par l'issue nous auons congneu le contraire. Car a parler franchement de sa uictoire, quel bien ne que aduentaige en est uenu a la chrestiente? Combien sen presche plus auant la parolle de Dieu: ou quel interet auons nous en l'un plus quen l'autre, que les erreurs & impostures de Mahomet soient preschees en Africque ou par ung More, ou par ung Turc? le ne uoy point, a dire uerite, quel l'un soit a la chrestiente plus aduantageux que l'autre.

Tu me diras, que Lempereur a faict acte digne de Roy de remettre & de restituer ung Roy deschaissé de son Royaume. le ne puis, ne ueuil nyer, q'il ne ait faict acte glorieux, & acte de Roy: mais ieusse estime ung acte plus digne & plus glorieux, si au lieu que pour restituer ung Roy infidele en ses pays, il a voulu hazarder la chrestiente, respendre le sang, diminuer les forces & le nombre des souldars utiles a la deffence dicelle, il eust voulu (ce que sans hazard, sans effusion de sang, sans diminution du nombre, ne des forces du peuple chrestien, il pouuoit & peult encores faire) restituer & remettre en ses pays, ung Roy de Nauarre chrestien, iniustement spolie, pour auoir adhere au grant pere dudict Empereur a la celebration d'ung concille, chose si requise & neces

nécessaire a la reformation de lesglise Chrestienne: ou sil
eust uoulu restituer ung Roy de France treschrestien, &
seigneurs ses enfans en leurs patrimoines, quil occupe
& detient iniustement.

Mais il ayme, par aduenture, mieulx auoir amytié avec-
ques les Mores, que avecques les Chrestiens, & ce pendant
il descric malheureusement & contre uerité le treschrestien
Roy son beaufrere, disant que ledict seigneur a intelligence
& communication entierement de tous affaires avecques le
Turcq, & ueult, que en accusation de telle importance, & cō-
tre ung tel Roy, il soit creu & adiousté foy a sa simple pa-
role, sans riens prouuer de son dire, ne par tesmoins, ne
par lettres, ne par aultres preuues requises, & si dautāt quil
laccuse que de sa seule parole, ie ueuil aussi luy nier son
dire, & descharger le Roy mon maistre par ma simple paro-
le, pourquoy ne seray ie creu plustost que luy? ueu que la
negatiue ne gist en preuue, mais que a laccusateur est de
prouuer ce quil met en faict, ou de se trouuer menteur es-
moute. Le mōde certainement seroit bien en mauuais train,
si en une chose de si grant poix, & contre ung prince de tel-
le qualite il suffisoit de gecter parolles a la uolée sans fonde-
ment & sans apparence,

Or ie te ueuil monstrier que lapparence est du tout au cō-
traire, & si ung chascun poise les raisons que ie te ueuil alle-
guer, ie suis asseure, quilz ne presteront plus loire a telles
meschancetes & controuuees calūnies, detractions. Premie-
rement est il pas certain que des la premiere inuasion, que
fist le Turcq es pays de Germanie, le Roy par lettres enuo-
yees a tous les estatx de Lempire offrit sa personne, & ses
forces iusques au nombre de cinquante mil hommes & du
nombre diceulx en soudoyer a ses despens iusques a trente
mille de uostre nation: Quant Lempereur entreprinst (com-
me ie disoye nagueres) son uoyage Daffricque ne laissa pas
le Roy couller de belles occasions, pour ne donner audict
Empereur occasion de deffiance, & sil eust eu si grāde com-
munica-

munication avecques le Turcq, & mis en luy son esperance, cōme Lempereur luy meēt a sus, & eust il pas entreprin le recouurement de son bien: lors que le Turcq estoit uictorieux par tout, ou ce pendant que ledict Empereur a esté empesche contre luy, non pas attendu a ceste heure que ledict Turcq a receu deux grosses bastōnades en Germanie une en Affricque, plusieurs contre le Roy de Perse, & qui est si rabaisse de force, comme Lempereur mesmes le scait & le faict publier, quil a plus de mestier de penser a se deffendre, que a trauailler aultruy.

Mais le Roy (ce me diras tu) a receu embassades du Turcq, & en a enuoye deuers luy, Il le confesse & maintiēt que en ce faisant, il na point fally. Lempereur & le Roy Ferdinand son frere en ont aussi receu, & y en ont enuoye, & en eulx il nest reprochable, a quel tiltre le peuuent ilz reprocher au Roy?

Or ie te diz dauantage, que le Roy neut oncques telle communication avecques le Turcq, cōme a eu Lempereur, qui pour gratifier audict Turcq, luy a remis entre ses mains certaines places fortes & inexpugnables au pais de la Moree lesquelles places les habitans, qui sont Chrestiens, uiuant soubz le Turcq en captiuite, auoient mis es mains dudict Empereur, en esperāce quil les tiendroīt, & meētroit iceulz pauvres habitans hors de seruitude, affin quil leur fust loisible, de liberement & publicquement uiure en leur Loy, & seruir Dieu. Ie te laisse maintenant penser comment ledict Turcq aura depuis traicte lesdictz pauvres habitans, congnossant que lesdictes places par eulx baillees a Lēpereur estoient une entree perpetuelle aux Chrestiens, pour recouurer Lempire de Constantinoble, & de plus grande importance contre luy, si elles nous fussent demourees, que ne fust oncques Rhodes, quil a tant trauaille a recouurer.

Mais ie men tais a tant: Et pour reuenir a ceste Embassade du Turcq, dont Lempereur faict si grandes exclamatiōs sans riens prouuer: Ie te dis & aduoue affin de le deschar-

ger de

ger de ceste preuue, que ledict Turcq a plusieurs foys en-
uoye messagiers au Roy, & a p tous moyēs possibles cher-
che de se asseurer de luy & de sa nation, comme de celle quil
traint le plus, & de laquelle ses predecesseurs ont plus este
trauaille, & laquelle sest si bien faict congnoistre par dela,
quon y appelle tous Chrestiens Francoys, pource quilz
ont point (ou bien peu) accoustume de sentir les armes
dautres Chrestiens que des Francoys. Je te dis dauantaige
que le Turcq, affin de paruenir a ce point, & dauoir paix
auec ladicte nation Frācoyse, a cherche toutes les uoyes ql
peu ymaginer pour gratifier & faire chose agreable au
Roy, iusques a luy offrir au temps de sa captiuite, au temps
de lostaige de messeigneurs ses enfans, & depuis encores
quilz sont en liberte, de luy donner tel secours, estant
en sa puissance, que le plaisir du Roy seroit de deman-
der: en sorte que ledict seigneur, na trouue personne
iustques aux infideles si mal traictable, que ledict Empe-
reur son beaufrere.

Or en aduouant ce que dessus, ie ueuil maintenir au de-
meurant, que le Roy aiant este constitue par tant de foys en
telles & si grandes difficultes de ses affaires, il luy a este au-
tant honorable de se passer dung si grant secours a luy of-
fert liberalement, par ung prince destrange loy, comme il
est reprochable a ung aultre (que pour ceste heure ie ne
ueuil nommer, mais a laduenture ne men pourray tenir cy
apres) dauoir instamment & par tous moyens honnestes
& deshonestes cherche dauoir secours dudict prince in-
fidele, & ne laoir peu obtenir, & dauoir uoulu pour y par-
uenir se faire tributaire & uassal diceluy, & auoir este par
luy contemne.

Et ie ne scay si on auoit faict a Lempereur telles & si
grandes indignitez, comme il les a faictes au Roy, & que
celuy qui les luy auroit faictes luy mist si souuent au nez, &
par reproche ceste communication auecques le Turcq, &
que luy ce pēdant se ueyst destitue de layde & appuy pres-

D 3 que

que de tous les aultres Chrestiens, & comme habandonne
en proye a son ennemy, ie ne scay (diz ie) sil tiēdroit a cas re-
prochable non seullemēt de accepter paix & alliance avec-
ques les Princes destrange loy, ce que Abraham, Dauid, Sa-
lomon, & les Macabees iustes & religieux princes nont est-
me a uice, ains lont acceptee, uoyre regse; mais de accepter
leur ayde silz la luy offroyrient telle & si liberalement, que
le Turcq a faict au Roy: Attendu mesmement que le droict
Canon permet a ung prince Chrestien spolie de son bien
par si puissant ennemy, que sans ayde daultuy il ne puisse
le recouurer, & ne puisse pour ce faire auoir appuy & se-
cours des aultres princes Chrestiens, en ce cas prendre ay-
de & secours des princes destrange & differente loy. Ains-
tu peulx congnoistre quel est le uoloir & intention de ton
Empereur enuers nostre Roy, & quelle affection il a de le
mettre en malueillance du monde, quant par faulte de ueri-
table accusation, il luy met a sus des choses, que si ores el-
les estoient ueritables, ne sen deburoit ensuiure reprehen-
sion: & quant elles seroient reprehensibles, on ne scauroit
monstrer quil en soit entache.

Doncques ie me tairay a tant de ceste accusation de la-
quelle Lēpereur mesmes & les siens ainsi quil appert a qui
poisera ce q̄ iay dict par cy deuant se peuuent prouuer estre
coupables plus tost q̄ le Roy quilz en accusent. Et si ceulx
mesmes qui len ueullent charger estoient adiurez par foy &
sermēt de dire uerite, ie cuyde quilz le confesseroient. Mais
pour tant quilz scauent combien le Turcq est irrite contre
Lempereur de ce que ledict Empereur a prins les armes
contre luy, non pour augmentation de la religion, qui a
este la coustume des anciens Empereurs, non pour de-
fendre le sien, qui est ordinaire a ung chascun, non pour
estandre ses limites, qui a meu plusieurs princes de haulte
entreprinse; mais pour restablir & remettre ung Roy infan-
dele, qui par aduenture recongnoistra ce bien faict a lufan-
ce de la foy Punicque, & seullement meu de cupidite
de gloi

de gloire, & d'une contētion quil semble que lesdictz Empe-
reur, & Turcq ayent prinse lung contre laultre pour la mo-
narchie du monde. Eulx pour ceste raison uoyans que le
Turcq irrite, comme dict est, lequel est prince magnanime,
appetant de gloire, ardent de uengeance, & qui par aduētuz
ne nest si affoibly que nous le faisons, quant il uerra la guer-
re allumee entre ces deux principaulx chefs de la Chrestie-
te, avecques telle obstination, comme Lempereur se uante,
ne fault point (au moins il est uray semblable, & a tous-
iours ainsi faict) de se preparer grandement pour faire une
grosse inuasion sur la Chrestiente, mais q̄ iceulx deux prin-
ces luy ayent assez donne de passetemps de se bien baptre
ensemble, sachās (dis ie) lesdictz accusateurs du Roy, & bien
preuoyans ce que dessus, sement ce bruiet a leur escient, af-
fin de gagner les deuans, & gecter leurs fondemens, sur les-
quelz aduenant cela, ilz puisse bastir une persuation au peu-
ple, que ledict Turcq ne se fera meu sinon pour uenir au se-
cours du Roy. Par quel moyen ilz esperent irriter toute la
Chrestiete cōtre ledict seigneur, & le opprimer aulx despēs
& dangier de ceulx, lesquelz mesmes ilz esperent apres la-
uoir opprime, quilz opprimeront plus facilement, & pour-
ront paruenir ou ilz pretendent. Et ie ne fais doubte, que a
ceste intention, & affin que ledict Turcq soit plus enclin &
craigne moins a faire descente, ilz ont donne conseil a Lem-
pereur de faire ceste publique protestation autant cruelle
le a ouyr, comme non digne de la uertu d'ung Chrestien
Empereur.

Maintenāt seray ie combatu de nouuelles armes, car ilz
me meētrent au deuant, qu'on a ueu en Africque en la puis-
sance de Barberousse des Enseignes de France, & de Lartile-
rie aulx armes & deuises du Roy. Je ne scay certainement
silz disent uray: mais il peult estre: Car Andre, & Anthoine
Dorye lun apres laultre ont soustraict au Roy & mene au
seruice de Lēpereur peu plus ou moins de quinze Galleres
bien armees, esgpees, & fournies, de Galiotz, artillerie, mu-
nititions,

nititions, & Enseignes de France, dont les unes quelque tēps
apres furent prinſes par les Galleres dudict Barberouſſe
auecques tout leur appareil & munitiōs. Et ſi leſdictz Do
rie euſſent eſte auſſi ſongneux de les garder au ſeruiſe de
Lempereur, cōme ilz furent diligens a les deſrober au Roy
ie oſeroys bien aſſeurer que de ce temps icy on neust poin
ueu en Africque, ne les enſeignes ne Lartillerie de France
Aultres foys les y a lon bien ueues, mais ce a eſte pour lex
tation de la Foy, & auecques meilleure & plus ſaincte exe
cution, & plus utile a la Chreſtiente, que ny ont eſte ueues
maintenant celles de Lēpereur, & de ce regne meſmes, y on
eſte ueues en auſſi iuſte & honorable querelle que celle
dudict ſeigneur.

Iauoye oublie, & preſque paſſe oultre ſans y penſer, a t
reſpondre ſur ung aultre precedēt article de ta lettre, par le
quel tu meſcriptz, que les Imperiaulx ſe uantēt bien de te
nir le Roy mon maĩſtre en leurs lacz, & qui ne ſe peult ſaul
uer, quil ne luy faille confeſſer auoir contreuenue au traict
de Cambray, & par ce moyen donne iuſte cauſe a Lempe
reur de luy mouuoir la guerre, Ceſt quil a (comme ilz maĩ
tiennent) donne le moyen au Duc de Virtemberg de faire la
guerre audict ſeigneur Empereur, & que ceſt choſe quil n
ſe peult nyer, Car iceluy Duc a touſiours paye ſes gens d
guerre en eſcuz ſoleil. Je uouldrois (grant amy) que ſur cet
article ilz ſe fuſſent contentez de la confeſſion & reſponſe
du Roy, Car il na iamais deſaduoue ql neust baille de largē
au Duc, leql Duc luy auroit uendu le Conte de Montpeli
cart: Mais en quoy aura uoulu le Duc employer ſes deniers
il a penſe touſiours, qui luy touchoit auſſi peu de ſen enqu
rir, cōme au Duc de ſenquerir que uouloit faire le Roy du
dict Conte. Car eſtant telle la nature du contract demption
& uendition, que tout ainſi que lacheteur demeure ſei
gneur de la choſe acheptee: auſſi le uendeur eſt en ſa liber
te demployer ſes deniers en ce que bon luy ſemblera. Il eſt a
penſer quilz ne ſoient tenus de reſpondre a aultruy des in
tentions

entions ou desseingz lung de laultre; mais puis quilz sont
ainsi curieulx de uouloir deuiner iusques aux pensees du
Roy, & me contraignent si auant a leur y respondre, ce que
ie ne puis faire sans descouurir les faictz & actes de Lempereur
insidieux & pernicieulx au saint Empire, ie leur demande
reciproquement, quilz me respondent a une aultre
question, & metz de faict que le cas est tel :

Entre Lempire & la couronne de France a une ancienne
alliance pour la mutuelle deffense et ptection des droictz &
priuillieges les ungs des aultres. Entre uostre Empereur et
nostre Roy a este faict depuis ung traicte particulier, par le
quel toutesfois generalement ne particulierement na este
deroge a lancien traicte, qui est uniuerfel entre Lempire &
nostre royaulme; aussi neust peu Lempereur le requerir sans
se rendre indigne de ce nom. Vng Duc prince de Lempire est
spolie de son Duché, ledict Duché peculierement affecte a
Lempire que deffaillant la ligne descendante du premier Duc,
il doiuue retourner a la chambre Imperiale, & que ce pendant
que icelle ligne durera il ne puisse estre mis en aultre rasse.
Lempereur en cõtreuenant a ce quil a iure au saint Empire,
apres la spoliatiõ de ce Duc ne remet ce Duché en la ligne.
En cõtreuenant secondement a son serment, ne le applique
a Lempire, mais a sa maison. En contreuenant pour la tierce
fois a son serment exempte iceluy Duché de lobeissance de
Lempire, se declairant estre par ce moyen enuers Lempire
imminuteur & nõ Auguste. le pose le cas, que ce Duc ainsi
dechasse, se soit retire uers le Roy, & q̃ tant en son nom prie
ue comme de la part de Lempire layt requis & somme quen
la uertu de la susdicte ancienne alliance, & pour le debuoir
en quoy par icelle il est oblige audict saint Empire, il luy
ueuille donner secours & alsister a remettre iceluy Duché
en lobeissance dudict Empire. Lempereur daultre coste re-
mõstre au Roy, quil ne le peult faire, sans cõtreuenir au par-
ticulier traicte quilz ont ensemble. Ledict seigneur Roy
uoit dune part, que par ledict traicte quil a faict avecques
E Lempere

Lempereur il ya quelque apparance qui ne se doibue empescher de cest affaire encontre ledict Empereur: daultre part il uoit, que par ledict traicte il nest deroge a lancien, & que par Lempereur, cōme iay dict, ne laura peu, ne peult demander maintenāt. Je uouldrois que ces diligens & curieux inuestigateurs, me respondissent ouuertement, a lobseruation de laquelle alliance doibt le Roy estre tenu, ou a lancienne concernant le bien public de deux prouinces de telle importance a la Chrestiente, comme sont Gaule, & Germanie: ou a la nouuelle, concernant le bien particulier de la maison Daustriche, au preiudice dudict saint Empire. Mais quilz mayēt satisfait a ceste questiō, ie aduiseray lors que ie leur deuray respondre sur le faict du Roy.

Iespere toutesfois que Lempereur osterā & eulx & moy de ceste peine, et croy de uray, q̄ cest article a este p̄ aucun adiouste malicieusemēt a la protestation dudict seigneur, pour donner occasion de parler contre luy en y respondant. Et ce qui plus me meut a le croire ainsi, cest que Lempereur & le Roy Ferdinand son frere ont aduoue par lettres signees de leurs mains, que pour le bien & repos de la Germanie, il estoit requis que ledict Duc de Virtemberg fut remis en ses pays. Et silz le congnoissent & aduouent ainsi, en quoy pourroiet ilz blasmer le Roy quāt ores il auroit donne secours au Duc de Virtemberg?

Tu mescriptz par apres, que plusieurs gros personages en uostre Germanie donnent grant blasme au Roy, de ce q̄ si long temps & iniustement il retient le Duché de Bourgongne, si iustement, & de droict hereditaire appartenant a Lempereur. Or affin que sur cest article tu ne demeures en faulse opinion, entends ung peu ceste histoire, & ie me tiens seur que par cy apres tu ny donneras aucun droict a Lempereur.

Ende Duc de Bourgongne eut une seule fille, & (si bien men souuient) nōmee Adelle, laquelle fut mariee avecques ung filz de Frāce, qui se porta de par elle a Duc & seigneur de Bour

de Bourgongne, & iouryt quelques annees, iusques a tant
que ung gentilhomme estrangier, pauvre de biens, le mist
en iustice deuant le Roy, pretendant ledict gentilhomme,
que a luy, qui se maintiennoit yssu par ligne masculine, de
pere en filz, des anciens Ducz de Bourgongne, debuoit ap
partenir ledict Duché, parce que de sa nature il ne pouuoit
tumber en quenouille. Le Roy uoulant administrer iustice
aussi bien contre que pour son filz, commist la cause (ainsi
quelle debuoit estre cōmise) au iugemēt des peres de France
: le gentilhomme prouua sa genealogie, monstra par ensei
gnemens, que les filles ny pouuoient succeder : En fin il ob
tint sentence a son prouffit, & fut le filz de France deposse
de, & luy mis en realle & actuelle possession du Duché, du
quel luy & sa posterite ont iouy iusques a troys ou quatre
generations, & tant que la ligne a dure.

Le te pourroys amener daultres exemples en ceste matiere
re, mais cestuy seul me semble suffisant pour monstrier claire
ment, que Lempereur ny peult riens pretendre : car cest ung
exemple incalumniabile en ceste matiere, dautāt quil est cer
tain, que le Roy qui assista au iugemēt, eust plus toust fauo
rise son filz que ung estrangier, & que les iuges filz eussent
este corruptibles, eussent plus tost este corrupuz de pro
messes, de dons, de faueur, de craincte par ung filz de France,
que par ung pauvre gentilhomme estrangier. Or est Lem
pereur filz de Marie, fille unique du Duc Charles de Bour
gongne, si que son droict prêt chief de fille, laquelle ne peult
y succeder.

Encores porrois ie en cest endroict mectre en auant, com
ment ce Duché uint au Duc Phelippes de Bourgōgne, pre
mier de ceste ligne : & combien le Roy Charles cinquieme
son frere usa de grande liberalite pour luy faire auoir la fem
me quil eut en mariage, duquel mariage sont uenus en
la maison Daustrie les biens quelle tient aujourdhuy en
Gaule Belgicque, & en basse Germanie : mais il pourroit
sembler que ieusse affecte ceste occasion, affin de mectre

en euidence l'ingratitude des successeurs diceluy Philippes
enuers ceulx dudidict Charles cinquiesme; & que par leur in-
gratitude ie uoulusse couurir celle dont tu mescrips qu'on
charge mon maistre. Mais au cōtraire iayme mieulx le pur-
ger & decharger de coulpe, q̄ de user de compēsation de cr-
me; qui seroit tacitamēt aduouer son ingratitude. En quoy
si ie dis chose qui charge l'honneur de ton Empereur, ie te
prie m'excuser, & cōsiderer, que ceste matiere est de telle na-
ture, que ie ne puis bōnement excuser mon maistre, sans ac-
cuser le tien. Toutesfois ie my gouuerneray en sorte, que tu
congnoistras euidemment, que ie suis par contraincte attiré
en ce propos, & non tumber uoluntairement.

Les Imperiaulx, ainsi que tu mescrips, disent, que le Roy
est ingrat du bon traictemēt que a faict Lempereur a luy es-
tāt prisonnier, & messeigneurs ses enfans estās en ostage, let
q̄ ilz disent auoir este traictez par luy treshumainement.

Je te dis grant amy: Si ne tuer point ung prisonnier long
temps apres q̄ la fureur de la bataille est passée, & beaucoup
de moys apres qu'on a pose les armes: Si le relacher plustost
avec ung extreme proufit, que le laisser, avec dommage &
perte de reputation, pourrir en prison, qui seroiēt deux cru-
aultez si horribles, quelles ne tumberent encore iames en
cœur de Prince, tant barbare fust il: Si cela (dis ie) peult es-
tre appellee souueraine humanite, ie confesse que le Roy &
messeigneurs ses enfans ont este treshumainemēt traictez.

Mais quant ie cōsidere la rancon que a paye le Roy, plus
grande (ainsi que ie disois nagueres) que ses predecesseurs
ne payerent onques aux Roys infideles, quant ilz ont este
leurs prisonniers: Et que par dessus ladicte rancon Lempereur
luy a baille sa seur a femme sans dot, la faict renoncer a
plusieurs grās pays, terres, & seigneuries a luy appartenās,
& a plusieurs droictz, appartenantz, & preuillieges de son
royaulme, oultre plusieurs aultres importables conditions,
que tous ceulx qui en ont ouy parler, les ont incōtinant iu-
gees iniques, & telles, que le Roy fil les pouuoit accomplir,
ne le

ne le deuroit faire: Et sil le uouloit, ne le pourroit. Alors ne puis ie me contenir, que ie ne nye, quil ayt este humaines ment traicte.

Dauantage ie considere, que ledict Empereur quelques importables cōditions quil ayt apposees au traicte de la deliurance dudit seigneur, encores ne leust il pas deliure a tel marche, sans ce que ses medecins, auquelz il lauoit baille en charge, & a penser en une griefue maladie, qui luy suruint en Espaigne, laduertirent du dangier ou il estoit: Et que si ores il uenoit en quelque conualescence, ilz ne pouuoient toutesfois esperer quil peust longuemēt uiure. Pour laq̃lle cause tous les conseillers dudit Empereur, et qui principallemēt desiroient son prouffit, luy remonstairēt, que sil pouuoit auoir en hostaige les deux filz plus aagez dudit seigneur, il feroit bien de le relacher. Car sil aduenoit quil mourut entre ses mains, oultre ce quon luy pourroit dōner quel que blasme, il auroit perdu sa proye, & tout le fruiet de sa uictoire: la ou au contraire, sil le relaschoit ayant ses enfans hostaigiers, & il mourroit par apres, il en seroit descharge, & auroit entre ses mains ung aultre Roy prisonnier: & cestuy la mourant, encore ung aultre, desquelz il auroit pareille rancon que dudit seigneur Roy: lequel aussi uenant en parfaite guarison, ne seroit moins songneux de la deliurance de ses enfans, q̃ de la sienne mesmes. Et a ceste psuasion ledict Empereur estimant que cest eschange seroit autant comme sil eschangerait ung Roy malade avec deux sains, & que sil prenoit double caution pour une, se delibera de relascher le dict seigneur Roy: ce quil neust faict aultrement, ainsi que ses gens disoient alors publicquement. Et uoyla lhumanite si tres singuliere, dont Lempereur a use enuers luy: lequel sil eut eu souuenance du conseil, que ung uieil pere dōna, comme recite Tite Liue, a son filz capitaine general des Samnites, il eust bien entendu, que entre clemence & cruaulte, ne se peult trouuer moyen.

Entens maintenāt lhumanite dont il a use enuers messeigneurs les enfans du Roy: Leditz seigneurs pour estre en

fort bas aage, auoiēt avecques eulx de nobles dames, ordonnees a prendre soing de leurs personnes, & de uieulx cheualiers pour les nourrir en meurs & conditions conuenables a leur estat. Auoiēt aussi quelques gentilzhōmes seruans, & plusieurs officiers domesticques, ainsi quil appartient a telz princes quilz sont, & lesquelz entrerent en Espagne avecques eulx par roole, & avecques saufconduict dudit seigneur Empereur. Toutesfois ledict seigneur qlque tēps apres leur fist oster lesdictz cheualiers & dames: & mesmes leur pedagogue, quon leur auoit baille pour les instituer es lettres: tous les aultres seruiteurs furēt uiolentemēt & honteusement encheinez, & mis en gallere par force, excepte ung petit Naim, qui ne passe point la haulteur du coulde, le quel tout seul il leur laissa de leurs seruiteurs. Et croy que encores leust il faict meētre en gallere, sil ne icust ueu trop foible pour tirer a la rame.

Tous les aultres dessusdictz seruiteurs gentilzhommes & aultres ont este miserablement & cruellemēt traictez esdictes galleres. Et nonobstant que par le traicte de Cambray dessus mentionne, ilz deburoient estre relaschez, & que a ceste fin & pour les requerir fut expres enuoye deuers L'empereur ung gentilhōme de par le Roy: ledict Empereur fist responce, que pour lors il ne le pouuoit faire: car il uouloit renuoyer ses galleres en Espagne, avecques lesquelles il estoit passe en Italie.

Le te laisse penser grant amy, si ceste excuse estoit suffisante a ung tel Empereur, & si plus tost q̄ de contreuenir a son traicte, incontinent apres qui fust conclud, & duql il obijce linfraction a aultruy, il ne debuoit pas acheter des esclauues, ou prendre des galioz mercenaires, nō pas retenir ainsi contre raison lesdictz pauvres & miserables officiers & seruiteurs de ces tresnobles ieunes princes. Aduint q̄ retournāt lesdictes galleres en Espagne, elles furent rencontrees par les Mores pyrates, qui en prindrent aucunes, & furent celles dont Barberousse a eu de lartillerie & des enseignes de France, & dedans lesq̄lles estoient iceulx miserables captifz, qui de

qui de la main de cruelz Chrestiens, tumberent en celle des Mores : ou ilz ont este les ungz si longuemēt, quilz y sont mors : les aultres, auquelz est mieux arriue, iusques a ce q̄ Lempereur fut a Thunis, auq̄l lieu ilz estoient de fortune, et par sa uictoire sont reuenus en France : mais bien pauvement, & mendians leur uie dhuys en huys, sans que ledict Empereur en recompēse du seruice quil en auoit tire, ne du martire quil leur auoit faict endurer inhumainement, & contre le droict des gens, leur ayt faict dōner de quoy se retirer en leurs maisons. Les aultres sont encores en ceste captiuite menans une uie plus miserable que la mort, loing de leurs peres, meres, femmes & enfans, au grand deshonneur, & a la grant charge enuers dieu & le monde, dudict seigneur Empereur, qui est ce pendant si misericordieux enuers les infideles, que de hazarder sa personne & ses forces, & despēdre son bien, & le sang des Chrestiens, pour les restituer & remettre en leur pays.

Voyla toutes les grādes humanitez dont les Imperiaux se uantent si magnificquemēt, que leur maistre a use enuers le Roy & mesdictz seigneurs ses enfans : Si non quilz uouissent aussi cōpter pour ung acte dhumanite, quilz ont, ie ne scay combien dānees retenu par force nostre Royne, seur aisnee de leurdict maistre, sans la uouloir laisser uenir deuers son desir seigneur & mary : laquelle dame nestoit toutesfois ne prisonniere de guerre, ne leur hostaigiere.

Ie croy grant amy, que iay respondu a tous les articles dont tu mas demande par ta lettre : ce que iay faict tumultuāremēt, & a haste, seulement pour te cōplaire, & nō pour estre cōmunique a tous. Car ainsi que iay deuāt dit, ie nay de cest affaire aulcune charge du Roy : lequel seigneur me eust peu informer beaucoup mieux, & plus amplemēt de ce qui sert a sa cause. Mais de ce peu q̄ ie ten escriptz, ie te ose bien asseurer, quil ny a riens, que uerite, dōt ie cuyde que tu me uouldras bien croire : car iusques icy tu ne mas point trouue ne menteur, ne legier parleur.





